

Ibru Leta

Yipa Itmikitijog Rigamna Iriki Ibru

Riga wa pilwa Leta

Isipkita Yitkak

Onggityam Ibru Leta irika riga ma b'obogil isipmari e aji ama rika Polte o Apolote. I irika riga itemb leta yirikonj re gar ke utkunda Ibru Riga wa pilwa na yepiya re bebig dide b'isadrena mile akatenento Palestin eriya o Roma taun wa, dide ama rika A.D. siksti powa dide siksti seben (64-67) kemag gangga nat.

Si opimemb gar ke utkunda rigap momta towaina gar ke utkunda mile b'itrarkam aukito dide ket itendam de Ju riga waina get ke kesam utkunda mile wa bebig dide b'isadrena map. I onggit pebat yindeney da gar ke utkunda mile re otomantijog e komkesa nya ke, aji ma ija e it re Ju rigaina kesam get ke utkunda mile re dide. Si Keriso re Godim pilkae, Ton re ukoi jog pumb wa e komkesa aneru i Mose i Yosuwu i dide komkesa si riga wa pilke. I Tonitemb kupkakupka Godim pilwa si omnika mile yundwatoni kesam peband si mile ririrind. Si Tina uj kak ke makwa ita yipa Godim si omnika mile ainy rina re kesam peba winind amnikenento.

I sapta ilebenind (11) esipkeniny re ongwati gar ke utkunda riga dide kongga im kesam peba wingirind. Si ton ket kea jog jog bebig dide b'isadrena mile akatenento gar ke utkunda mile owamam i ket ukoi jog warim b'ogil isma dide nony

b'ijawa aramkenento Godim pilwa gar ke utkunda wimenand.

Godimna B'iga Yesu Keriso

¹ Naskand b'ila kesam peba winind, God jogjogpyam bageyam engaeneninonj re jogjog b'engabenga nya kena Ju riga yitnono omnenam.

² I ket onggit kikitum winind re kesam peba win b'undwatapu wa awonj, God Ti B'igand yingawonj meranim yitnono omnenam. Si God Tin yonyitonj komkesa gasa owabinta rigam, i kwa Ti pilkena wub ake gou dide komkesa gasa amnikinonj. ³ Si Ton enyorki yibim re Godimna b'ogil inyomarena kae, i Ton re Godimna kukipjog riga e, i Ton Tina danda kima yit ke komkesa gasa emorka eyeniny, i dide Ton riga kilkesa amninonj negir mile ke. Ngirpu onggit kak ke Ton juwai kima pipmetind omitonj ukoi jog Godimna yimjog yim tab ke de pumb tungg wa.

Keriso re Pumbjog wa e Aneru wa pilke

⁴ Si Ton ukoi jog iwinti riga na awonj aneru wa pilke odede ringma re Godim pilke okati Tina nyi iwinti yibim komkesa aneru waina nyi wa pilke.

⁵ Mop nokip God makwa ke ringgit win nat yipa anerund yomnonj da,

“Man re Koina B'iga et,

si yu Kon kemb Mor B'u e aen.”

I daka makwa ke yomnonj da,

“Kon Ti B'u e taen,

i Ton re Kor B'iga e tau.”

Aji Ton Kerisom pilwa nena na odede yit yopulitonj. ⁶ I onggit winind re God Tina naskajog B'iga

onggit gowukoi wa itmikitam yomnonj, Ton ija naemb ji yindenonj da,

“Si komkesa Godimna aneru b'ogla kumsos b'amkinam Ti pilwa.”

⁷ I Ton aneru wa gatab yindenonj da,

“God Tina aneru amnikinonj re rib pila wiko riga na,

i Tina wiko riga amnikinonj re wul dimil pila wiko riga na.”

⁸ I kwa onggit B'iga gatab yindonj da,

“God, Moina wip omnenapu kasa re dadal ngirpu kesa e yibim,

i Man wip omnenapu kutip ke Moina pumb tungg wip yiyenyit re dimdimjog e.

⁹ I Man singi yiyenyit re negir kesa dimdimjog mile e, i Man singi kesa yomnennyit re nenegirjog mile e.

Si onggit mop penaemb God, Moina God, Ton gaya ke meaukonj ukoi sam kima,

i God makwa ke yipa odede sam yomnikonj Moina kegwar wa wingirind.”

¹⁰ I kwa yina pebat yindonj da,

“Yonggyam, otomapu ke Manit gowukoi yotobarkot,

i komkesa wub re Moina yim ke omniki im.

¹¹ I ton opima negir taukanj dem, aji Man indama imnineni kesa dadal mitibnyit dem.

I kwa ton komkesa opima kobirgim pila gujguj taukanj dem.

¹² I Man ten teorominsinyit dem gujguj kobirgim pila,

i ket sisilim sensi tamnikinyit dem kobirgim pila.

Aji Man Molenggyam ra imnineni kesa e mitibnyit
dem dadal ngirpu kesa,
dide Moina kemag ra makwa opima seg
taukanj dem.”

¹³ I God makwa ke ringgit winind yipa anerund
yomnonj da,

“Man omite Koina yimjog yim tab ke juwai kima
pipmetind,

ngirpu ra ket Kon Moina geja riga gou wa
tamninyin dem

dide taramisinyin dem Moina pis wirand
Moina danda ondratenam towa kumbind.”

Aji Ton Kerisom pilwa nena na odede yit yopuli-
tonj. ¹⁴ Si ridede riga im aneru? Ton komkesa re
wingawinga im dide Godimna wiko riga im yena
re God etnikisinonj Tina wiko omniam. Nokim
da idenat ton ten yim takauranj yepiya ra yirkokar
owabindenya.

2

Nonony Yitkak Utkunda kesa Mile gatab

¹ Si onggit mop paemb men b'ogla iminjogjog
gar ke onggityam yitkak rakateninum rina re
men utkudentondam. Si ra men maka odede
tamnikindam, onggit nony kesa milep men
opima nony netidamkenenanj onggit iminjog
yitkakim pilke odede ringma ra ngiwirit gasa
aulaul teyeniny deta b'enga gatab wa. ² Mop
nokip onggityam bage yit rina re God yopuren-
onj aneru waina tugim ke re iminjog imjati e, i dide
odede komkesa rigap kea negir ma b'isagika mira
yokateneno towaina omniki ririrind yepiya re
onggityam yitkak onygika yiyeneno dide maka

yimta yundokeneno. ³ I yirkokar okatam yitkak re ukoijog e. Si ra men onggityam yitkak maka b'obogil okatenyu, ridede im men odede negir ma b'isagika miram pilke titringenjindam? Ma ririr e. Mop nokip Yonggyam Yesu Tilenggyam kea naskajog onggityam yitkak pitapita yomnonj, i yepiya re onggityam yitkak utkundeno Ti pilke, toda kea meranim iminjogjog gar ke yimjateno da, “Itemb re iminjog yirkokar okatam yitkak e.” ⁴ I God daka kea towa agoninonj kid kesa kima danda wiko i moga kima danda wiko i dide b'engabenga wip danda wiko, i ingkenaemb ket Ton yipand ton kima onggityam yitkak yimjatenonj. I ket Ton Tina gar ke singi ririrind Yinayina Wingawingand yingaenonj gar ke utkunda riga wa yiyag wurar ogonam, i ingkenaemb kwa daka onggityam yitkak yimjatenonj.

Yesu Riga Jiwiw Awonj

⁵ I men yitnono ainindam re onggit sisil gowukoi gatab e rinte ra ik. Aji God maka onggityam sisil gowukoi aneru wa yim kumb wa yoramitonj wip iyenam. ⁶ I kwa yina pebat yipa gatabind ija emb ji yir ungata yit yindenya da,

“Nangga pae Man onggit Rigam pilwa nony kubir aenyit?

I nangga pae Man onggit Rigamna B'igand yir ipka yiyenyit?

⁷ I re Ton onggit gowukoyind yibnonj,

sobijog ganggand Man kea Tin sobijog ngai goujog pipmetind yoramitot aneru wa pilke.

Aji kwa Man ket Tin b'ogil inyomarena kima dide isnawa kima b'ogil dira yikitot wip omnenam.

⁸ Si God, Man komkesa gasa gou wa amninot dide aramisinot Kerisomna pis wirand danda ondratenam towa kumbind.”

Si rada God kea komkesa gasa gou wa amninonj Tinim wip omnenam, si awir e kwa nanggamog gasa e komb yibim. Aji men komkesa gasa yir ongong eyenindam wip da rika ton makwa kupka Tina wip omnena danda wira nasim wekeny. ⁹ Aji God kea Yesund sobijog ganggand sobijog ngai goujog pipmetind yoramitonj aneru wa pilke. I Yesu, Ton ket b'idgotnena kima wul b'agbagind uj awonj, si ingkenaemb ket God Tina b'ogil inyomarena kima dide isnawa kima b'ogil dira yikitonj wip omnenam. Si Ton Godimna wurar map uj awonj komkesa rigaina negir mile irabikam. Si men itaemb ji riga Yesund yir ongong yiyenyu.

¹⁰ Itemb ji God yet re komkesa gasa atobarkinonj i komkesa gasa wip omnena eyeniny. I Ton singi awonj Tina jogjog b'iga iyenam Tina b'ogil inyomarena wa. Si Ton nenate ririrkipjog riga itemb Yesund b'idgotnenand oramitam, nokim da idenat Yesu ririrkipjog wip omnena riga tainy towanim yirkokar okawam. ¹¹ I Yesu yete re Godimna riga yina omnena eyeniny dide riga yepim re yina aukanj, ton komkesa re yipaina B'u Godim pilkaim. Si onggit mop paemb Yesu ma ita ingar aeny ten nyi ogenayam da Kor yingganwar. ¹² I Yesu Keriso Godind yomnonj da,

“Kon ita Moina nyi pitapita omnenyın Koina

yingganwar wa pilwa.

Ɔ Kon ita ger ke metisourenyin Moina sosi wingirind.”

¹³ Ɔ Ton b'usaya yindeny da,

“Kon Kolenggyam Koina nony b'ijawa oramitenyin Godim pilwa.”

Ɔ kwa b'usaya yindeny da,

“Yir de, Kon ita Godimna b'igawar kima nibnyin yena re God Kor nokainonj.”

¹⁴ Ɔ opimemb Godimna b'igawar re kus dide mi kima riga im. Si onggit paemb Yesu kea Todaka kus kima dide mi kima riga awonj. Ɔ ingkenaemb Ton onggit Godimna b'igawar kima yipa wipjog riga ji awonj. Nokim da ra Ton uj okas onggit ji ke, idenat Ton Satanand eomneny yete re ujimna danda emorki yowam. ¹⁵ Ɔ kwa idenat Ton riga tetringasiny yepim re uj moga map wiko riga pila yilo wimena wuweny towaina kupka yirkokar wingirind. ¹⁶ Mop nokip itemb re iminjog e da Ton ma aneru yim okawa mana uj awonj, aji Abraamimna b'usmureni b'igawar yim okawa mana. ¹⁷ Si Ton b'ogla komkesa nya ke Tina yingganwar kima yipa wipjog riga tau, nokim da ra Ton kear kima nony ijai yina mopyam si riga tau, idenat Ton Tilenggyam si gasa tau Godim pilwa Godimna b'igawar waina negir mile irabikam. ¹⁸ Ɔ Ton kea Tilenggyam otonkena dide b'idgotnena akateninonj, si onggit paemb Ton ririr e riga yim takaeniny yepim re otonkena akatenanj.

3

Keriso re Pumbjog wa e Mosem pilke

¹ Si onggit paemb, yina omni gar ke utkunda nany dide yingganwar yena re God pumb tungg wa menonim ara emokinonj, win kupkakupka nonyik b'atimdenindam Yesum pilwa, ite re itmikitijog riga dide yina mopyam si riga ya pilwa im re men pitapita ainindam meraina gar ke utkunda gatab. ² I Ton Godim pilwa nony b'ijawa riga na yibnonj yet re Tin yobagendonj odede yipa wip rija na re Mose nony b'ijawa riga yibnonj Godimna kupka metind. ³ I met oranga rigate ukoi jog isnawa okateny aji ma mette. Si odede yipa wip ke Yesu b'ogla ukoi jog b'ogil inyomarena yakaten, aji Mosem pilwa re sobijog e. ⁴ Mop nokip komkesa met yipayipa wa re towa opima orangka riga. Aji God re komkesa gasam omnika riga e. ⁵ Si Mose re nony ijai riga na yibnonj Godimna kupka metind met yir ipka wiko riga ririrind. Nokim da idenat ton Ju riga wa pilwa yir ungata yit pitapita tamneniny nangga im ra God wari pitapita tamneniny dem. ⁶ Aji Keriso re nony ijai riga na yibnonj Godimna metind Tina B'iga ririrind. I rada men warim b'ogil isma e yokatenyu Yesum pilind dide rada kwa moga kesa imjatena kima dide b'asourena kima onggityam warim b'ogil isma emorka yiyenyu, si men re onggityam Godimna met im.

Gar ke Utkunda kesa Mile gatab Nonony Yitkak

⁷ Si onggit paemb Yinayina Wingawinga ija emb ji yindenya da,

“Yu ra win Godind nonykok utkundenya,

⁸ win goro waina gar rogilkak tamnikina

odede rija na re Ju rigap Godim pilwa soro
 kima bebig mile amnikenento onggit
 winind
 re ton Godind nenegir kana otonkena yiyeno
 de wul kesa tunggind.

⁹ Si wa b'uarip re kea yir ongong eyento mile rina
 re Kon amnikeneninond poti (40) kemag
 kima,
 aji ton kwa kea nenegir kana b'ajgatena kima
 otonkena niyeneno.

¹⁰ Si onggit penaemb Kon onggit riga wa pilwa gar
 ke komliu awond,
 i ket nindenond da, 'Wii, towaina gar re Kor pilke
 b'enga tab wa im wuweny.

Si ton Koina nya gatab wumir kesa im wekeny
 rinsim ra ton pop b'ogla yimta tundokanj.'

¹¹ Si Kon onggityam Koina ukoi komliu wingirind
 danda kima nindenond Koina nyi kima
 odede da,
 'Ton ma opima b'itgarkanj Koina wirampu
 tungg wa.' "

¹² Gar ke utkunda nany dide yingganwar! Win
 yir kima tekenyit da rika amaya ita yipa odede
 negirjog dide utkunda kesa gar kima riga yibim wa
 wingirind. Si odede gartemb wen wip teyeniny
 yirkokar Godind kak iawam. ¹³ Aji win b'ogla
 walenggyam walenggyam b'ugowa tuwenyit bibir
 weanjweanj ama ra ama ra bibir ite re ogenaya
 da "yu" ngirpu de gowukoi kikitum bibir wa.
 Nokim da idenat wa wingirind maka yipa rigat gar
 rogilkak tawik negir milemna ijongki nya ke. ¹⁴ I
 re men naskajog gar ke utkunda mile yotomonda,
 men iminjog kea Godind nony yijawonda. Si ra

men danda kima emorka teyenindam onggityam
 Godind nony ijawa mile ngirpu undwatapu wa,
 men opima yingg takatenindam nangga im re
 Kerisom pilind wekeny. ¹⁵ Si yina pebat onggit
 gatab ija emb ji yindeny da,

“Yu ra win Godind nonykok utkundernya,
 win goro waina gar rogilkak tamnikinam odede
 rija na re Ju rigap soro kima bebig mile
 amnikenento.”

¹⁶ Si yepim ji riga re Godimna nonykok utkun-
 deno i onggit kak ke ket soro kima bebig mile
 amnikenento? Ma ma tonpiya komkesa riga yena
 re Mose apekinonj Ejipt kantri ke? Owi, ton-
 piyamb. ¹⁷ I ya pilwa na God gar ke komliu awonj
 poti (40) kemag kima? Ma ma towa pilwa na
 yepiya re negir mile amnikenento, i ket uj sap
 otekto wul kesa tunggind? Owi, towa pilwa na.
¹⁸ I ya pilwa na God danda kima yindonj Tina nyi
 kima da, “Win makwa opima b'itgarkindam Koina
 wirampu tungg wa”? Ma ma towa pilwa na yepiya
 re maka Tin yutkundo? Owi, towa pilwa na. ¹⁹ Si
 men kea wumir aindam da ton makwa ririr na
 b'igarkam aukito, nokip ton maka Godind gar ke
 utkunda ke yokato.

4

Gar ke Utkunda Riga Wa Wiram

¹ Si onggit paemb nangga ma ji da God kea
 mera tirir yit yiraronj Tina wirampu tungg wa
 b'igaram Ton kima wimenam, men moga rainum
 da ke wa wingirind yipa riga yeulit dem onggit
 tungg wa b'igaram. ² Mop nokip medaka re onggit
 Godimna wirampu tungg wa b'igaram gatab God

ma b'ogil yirkokar bage yit kea yokatonda Ju riga re dide. Aji towanim onggityam yitkak re kip kesa na aukonj, mop nokip ton maka onggityam yitkak gar ke utkunda ke yokateno re ton utkundeno. ³ I men yepim re onggityam yitkak gar ke utkunda ke yokatenyu, men opima onggit wirampu tungg wa b'igarka wuwenyin. I nangga ma ji da God gowukoi otomapu ke kea undwasinonj onggit wirampu tungg gatab wiko, aji gar ke utkunda kesa riga wanim re ija emb ji tawik rija na re God yindonj odede da,

“Kon danda kima tirir yit nindenond gar komliu kima da,

‘Ton ma opima b'itgarkanj Koina wirampu tungg wa.’”

⁴ Si men kea onggit gatab wumir aindam, mop nokip yina pebat indama rokate odede yindeny sebenim bibir gatab da, “Si God komkesa Tina wiko ke wiram yibnonj re sebenim bibir nat.”

⁵ I kwa daka b'usaya onggit gatab yindeny da, “Ton ma opima b'itgarkanj Koina wirampu tungg wa.” ⁶ Si iminjog e da God ita ji yit yiraronj ninda riga b'igarkam onggit wirampu tungg wa.

Aji Ju riga yepiya re naskand onggit gatab God ma b'ogil yirkokar bage yit yutkundeno, ton maka b'igarkito onggit wirampu tungg wa, nokip ton maka onggityam yitkak gar ke utkunda ke yokato.

⁷ I onggit kak ke re pinjog win tetiyauto, Dawid yipa peba yirikonj. I onggit peband God b'usaya yipa bibir yobagendonj ogenaya da “yu” i naska nata yindenonj da,

“Yu ra win Godind nonykok utkundenya,
win goro waina gar rogilkak tamnikinam.”

⁸ Mop nokip rada Yosowa kea Ju riga wip eyinonj Kanaan gou wa onggit wiram okatam, si onggit win kak ke ma rako God yindenonj b'enga bibir gatab wirampu tungg wa b'igarkam. ⁹ Si onggit paemb ita ji ik onggityam wiram bibir odede rija na re God wiram yibnonj sebenim bibirind. ¹⁰ Mop nokip rada yipa riga kea Godimna onggit wiram wa e b'igari yibim, todaka tina omnika wikom pilke wiram e yibneneny odede rija na re God Tina wikom pilke wiram yibnonj. ¹¹ Si onggit paemb men b'ogla kupkakupka danda yandratu onggit wiram wa b'igarkam. Nokim da idenat maka yet onggit Ju riga waina utkunda kesa wingata mile yimta tundokiny i ket negir tainy.

¹² I Godimna yitkak re yilo e yibim dide danda kima e wiko omnika yiyeny. I itemb yitkak re moge orkak, aji ma ija e opi re komkesa b'obogil iiniki or tabtab giri re dide. Si itemb yitkak b'ogla rigaina gar wa b'atunjis, i ket b'ogla komkesa wingirind kipear emamka teyeniny ngirpu kwa emamka teyeny kukip ake wingawinga, i kwa komkesa eiweka teyeniny oknindenapu dide komkesa kak iposka teyeniny mul emamkam. I dide kwa ita onggit yitkakit komkesa nonyik b'amdenda dide ipindena tekalneniny meraina garind. ¹³ Si komkesa otobarki gasa wingirind awir e kwa nangga e egiti yibim Godim yirind. Si kwa komkesa gasa Godim yirind re wi kesa im dide pitakip nasim aukenenanj. I men komkesa b'ogla b'atgenaindam Godim pilwa komkesa nangga im re men omnika teyenindam.

Yina Mopyam Si Riga Yesu

¹⁴ Si onggit paemb mera ita yipa ukoi jog yina mopyam si riga yibim yet re pumb tungg wa yikonj, it re Yesu Godimna B'iga. Si men b'ogla gar ke utkunda mile danda kima emorka yeyenu rina re men Ti pilind yoramitonda. ¹⁵ Mop nokip itemb meraina Yina Mopyam Si Riga ririr e meraina igomendena mile takasiny, nokip Ton Tilenggyam kea wip awarkenening komkesa negir otokena mile men re dide, aji Ton makwa ke yipa negir mile yomnikonj. ¹⁶ Si onggit paemb men b'ogla moga kesa wowin Godimna wip omnenapu kasa wa ringkae re Ton mera wurar ogona niyeniny. Nokim da idenat men Tina kear yir ongu dide men Ti pilke yim b'akawa takatenindam ita meraina b'araka winind.

5

¹ Si kesam peba winind God komkesa yipayipa yina mopyam si riga emjinonj re riga wa pilkena, i ket aramkinonj riga wa gatab ke wiko iyenam odede rinsim re wekeny Godim pilwa omnikam. Nokim da idenat ton Godim pilwa singi si gasa dide si b'angga teyenanj rigaina negir mile eomnenam. ² Si ton ririr im odede riga ngimbla ke tamnenanj yepim re wumir kesa o kaokao milend wekeny. Mop nokip todaka towalenggyam ton kima yipa wip egomenda mile nasim wekeny. ³ Si onggit towaina igomenda mile map ton b'ogla naska si b'angga reyeninem Godim pilwa onggityam towainajog negir mile eomnenam, i ingkaemb ket si b'angga teyenanj rigaina negir mile eomnenam. ⁴ I makwa yipa rigat ita tilenggyam b'urowatena ke okas onggityam yina mopyam si riga nyi. Aji

b'ogla ra God tin ara emok onggityam nyiwim odede rija na re Ton Aronind ara yemokonj.

⁵ Si onggit paemb Keriso daka maka Tilenggyam b'asoulitonj yina mopyam si riga awowim. Aji Godit Tin yobagendonj, i ket yomnonj da,

“Man re Koina B'iga et,
si yu Kon kemb Mor B'u e aen.”

⁶ I kwa yipa b'enga peband ija emb ji yindenj da,
“Man re dadal ngirpu kesa yina si riga e aet
odede nya ke it re Melkisedek re dide.”

⁷ I onggit winind re Yesu yilo wimena yikenonj onggit gowukoyind, Ton ukoi yii b'irinena kima dide yirekip kima Godim pilwa yir opmitenenonj dide yigekekenonj yete re ririrkipjog riga yibim Tinim yirkokar okawam uj ke. I God kea Tin yutkundenonj, nokip Ton kea b'obogil isnawa kima Tin ewangaya yiyenonj. ⁸ Nangga ma ji da Ton re Godimna B'iga na, aji Ton kea b'idgotnena yokatenonj, i odede nya kenaemb Ton b'auyaena yokatenonj Godind utkundenam. ⁹ I odede nya kenaemb God Tin ririrkipjog yina mopyam si rigam yomnonj. I ingkenaemb Ton dadal ngirpu kesa yirkokar okawam rigib riga awonj komkesa riga wa yepim re Tin yutkundenyi. ¹⁰ Si God ket Tin pitapita yomnonj da Ton re kemb yina mopyam si riga e ainy odede nya ke it re Melkisedek re dide.

Nonony Yitkak Wingawinga ke Isendena gatab

¹¹ I sowa pilind re jogjog im yitkak wekeny onggit yina mopyam si riga Melkisedekim gatab wen wumir omnenam. Aji itemb re seojog e wanim isipkenam, mop nokip wanim yitkak isipmarenam re il b'angkajog im aukanj. ¹² I win

pinjog na gar ke utkundand wimena tuyit. Si yu win b'ogla rako ket ouyaena riga na wekenyit. Aji win kwa bea b'auyaena okatenya Godimna peba wingirind ninda tumtum ouyaena yitkak gatab rinsim re rigap naskajog b'auyaenenanj gar ke utkunda riga awowim. Si win odede tumtum ouyaena yitkak nena mim singi ainindam odede ringmim re papa b'igap ngom mebo nena anaikenenanj. Aji win ma ririr im seoseo ngorjog yitkak okatam odede ringmim re rigajogip seoseo owou awenenanj. ¹³ I yet ra odede ngom mebo pila tumtum ouyaena nenamb singi taeny, ti awir e wumir yibnau negir kesa dimdimjog mile gatab yitkakim. Nokip ton re papa b'iga pila e. ¹⁴ Aji seoseo owou pila ouyaena yitkak re rigajog wa mim. Si rigajogip re towaina wingawinga ke ipindena kaim siram b'irari kesa b'auyaena dide b'asowa wuweny ikalnenam da b'ogil e o negir e. Si ingkaimemb ton ket dimdim wimena wuweny.

6

¹ Si onggit paemb men goro Kerisom gatab tumtum ouyaena nena rusaireneninum, aji b'ogla b'esonkeneninum seoseo ngorjog yitkak ouyaena wa rigajog awowim. Si men goro odede naskajog tumtum b'auyaeni yitkak rusaireneninum, opi re ujimna negir mile ke Godim pilwa engenda gatab yitkak, i Godind gar ke utkunda gatab yitkak, ² i baptiso gatab yitkak, i riga wa kumbind yim oramita gatab yitkak, i uj riga utnyita gatab yitkak, i dide dadal ngirpu kesa b'isagika gatab yitkak. ³ Aji men b'ogla odede ngorjog seoseo yitkak b'auyaena wa b'isonkena wowenin ra toda

God nitinjikisiny omniam. ⁴ I opima odede riga wekeny yepiya re yipapyam Godimna ngaya wa b'igarkito, i met atonkento pumb tunggimna yiyag wurar, i Yinayina Wingawingam pilke yingg akatento, ⁵ i dide epindenento Godimna b'ogil yitkak dide danda rinsim ra Godimna rigap takatenanj wari sisil gowukoyind. ⁶ Aji ra ton isayi God ma b'ogil yirkokar bage yit i ket Godind kak iayi, ton ma ririr im b'usaya negir mile ke tengendanj Godim pilwa. Mop nokip ton towalenggyam odede mile ke Godimna B'igand

b'usaya wul b'agbagind idrika yiyenyi dide ket ma sobijog ingar kima e Tin pitand yomnikenenyi. ⁷ I ra gowit piro okateneny rinte ra ita winind pumb ke tisokeneny, i ket tawinkenening owou nangg mogji omniam onggit gou yonggyamim yet re yoskonj. I odede gou re Godim pilke b'ogil okati e. Si wa wingirind opima kwa odede Godim pilke b'ogil okati riga wekeny. ⁸ I kwa ra gowit tawinkenening wanja o tib nena, itemb gou re ita etom. I itemb gou re Godim pilke sake okati e, i ket gou yonggyam ita wul ke so ominy dem. Si kwa ninda riga opima odede Godim pilke sake okati wekeny i ton opima Godim pilke negir ma b'isagika okasi dem.

⁹ Sowa rigawar yena re sin singi eyenindam! Nangga ma ji da sin kea odede yit apurenindam, aji sin iminjog wen emjatenindam da wa opima b'ogil mile ebnainy i onggit milepim wen wip eiranj yirkokar okatam. ¹⁰ I God re dimdimjog mile riga e. Si Ton ma ita nony b'etidasiny waina b'asowa mile dide waina singi b'iyena mile rina re win pitapita amnentondam Tina nyi map. I

win yina riga naskand yim akaenentondam dide yu yim akaenenindam re onggit singi b'iyena mile kaim. ¹¹ I sin ukoi singi aenindam da win yipayipa rigap onggit singi b'iyena mile nenand kinyir aena wuyit ita winind, ngirpu ra waina yirkokar seg tauranj. Nokim da idenat waina warim b'ogil isma ririrkip tau. ¹² I sin ma singi im da win gim dinder tainindam, aji sin singi im da win towaina mile na takatenindam yepim re gar ke utkunda milend dide mimkam wimena milend wekeny i ingkaim ton awabindenanj Godimna b'ogil gasa rina re ton tirir amninonj okaenam.

Godimna Iminjog Tirir Omni Yitkak

¹³ I re God Abraamim tirir omni yit yokawonj, Ton Tinajog nyi kima na yindonj. Mop nokip awir e kwa yete Ti pumb ke yibim tina nyi kima tirir omni yit opulitam. ¹⁴ Si God tirir omni yit yindonj da, "Kon ita iminjog men b'ogil motinyin, i Kon kwa ita iminjog moina b'igawar usmurena teyeninyin mornim." ¹⁵ Seg re ket Abraam mimkam wimena ke yir ungauka teyinonj Godimna tirir omni yit ririrkip aukam. Ngirpu ton ket kea komkesa akasinonj nangga mana re God tirir omni yit yopulitonj. ¹⁶ Si ra rigap danda kima tirir yit opulisi, ton ukoi jog rigamna nyi kima im danda kima yit tapurenanj yete re yibim towa pumb ke. Si ra onggit ukoi jog rigamna nyi kima tirir omni yit opulisi, si onggit yittemb komkesa towaina yit b'ugwatena iminjog danda kima temjasiny dide komkesa tepenjiny. ¹⁷ I God ukoi jog singi awonj da yepiya ra owabinsi Tina tirir omni yit, ton opima onggityam yit iminjog danda kima imjatenyi da

Tina ril makwa ita b'etnjenj. Si onggit penaemb Ton danda kima Tina nyi kima tirir omni yit yindonj. ¹⁸ I re God yindenonj tirir omni yit ke dide Tina nyi kima, si onggit nimognimog opurena nya kenaemb meranim yimjatenonj da Ton makwa ita b'etnjenj. Si onggit paemb Ton ma ririr e b'anyginena nya ke onggityam tirir omni yit erbek. Si men b'ogla ukoi jog b'ugowa yakatenu onggitim, nokip men b'ikenindam re emorka ma warim b'ogil isma rina re God meranim yoramitonj Kerisom pilind okatam. ¹⁹ Si men b'obogil meraina wingawinga danda kima emorki tawamindam onggit warim b'ogil ismam pilind odede ringma ra giga emorki ibim angkam pilind giga mumakesa omnam. I odede miletemb men wip niyiny b'igaram de yinayina kok wingir wa pumb tungg yinametind. ²⁰ I Yesu meranim naska b'ikok riga na awonj, i b'igaronj onggit pipmet wa meranim. Si Ton dadal ngirpu kesa yina si riga na awonj odede nya ke it re Melkisedek re dide.

7

Yina Si Riga Melkisedek

¹ Si itemb riga Melkisedek re Salem taunimna king dide pumbjog Godimna si riga na yibnonj. I re Abraam ninda king gou wa amninonj dide re ket itendonj, Melkisedek kea Abraamind wipwip yomnonj. Ngirpu ton ket tin b'ogil yomnonj. ² Seg Abraam ket Melkisedekim komkesa gasa ten (10) ikalki wingirind yipa tab yokawonj. I naskajog tina nyi isipkita re negir kesa dimdimjog milemna king e, i kwa Salem taunimna king e, it

re isiṓkita da ngimblamna king. ³ I kwa ti gatab awir im wumir wekeny, opi re ti b'u ake mog gatab, i ti dadwar gatab ringkae re ton b'usmurena ikonj, i dide tina ukendipu win dide tina yirkokar b'undwatapu win gatab. I ton re Godimna B'iga pila e wimena yikeny, si dadal ngirpu kesa yina si riga e yibneneny.

⁴ Si win b'ogla nony menamena amnikinam da ridede ukoi jog riga na yibnonj Melkisedek. Si mera ukoi b'u Abraam komkesa gasa ten (10) bobo akalkinonj rina re ton gejapu wa akasinonj, i ton ket Melkisedekim yipa b'ogil jog bobo yokawonj onggit ten (10) bobo wingirind. ⁵ I gog yitit ija naemb ji engainonj da yina si riga yepim re Lebi gu wingirind wekeny, ton b'ogla komkesa Ju riga wa pilke gasa ten (10) ikalki wingirind yipa tab imda teyenanj, nangga ma ji da ton komkesa re Abraamim pilke b'usmureni nanyingganwar im.

⁶ Aji Melkisedek re ma Lebi gu ke b'usmureni riga na, aji ton Abraamim pilkena emjinonj gasa ten (10) ikalki wingirind yipa tab. I ton ket Abraamind b'ogil yomnonj yet re Godimna tirir omni yit akasinonj. ⁷ Si itemb re ma b'arkena kima yit e da riga b'ogil omna riga re pumb ke riga e aji b'ogil okati riga re gou ke riga e. ⁸ I kwa Lebi gu ke yina si riga gatabim re ija emb ji da ton re uj aukam riga im, aji ton kea Ju riga wa pilke gasa ten (10) ikalki wingirind yipa tab imda eyenento. Aji daka Melkisedekim gatab re ija emb ji da ton re yilo wimenam yir ungata yit kima e yibneneny, i ton ket Abraamim pilke gasa ten (10) ikalki wingirind yipa tab yokatonj. ⁹ Si nangga ma ji da Lebi gu riga re kea Ju riga wa

pilke gasa ten (10) ikalki wingirind yipa tab imda eyenento, men b'ogil im odede yit nitindenindam da re Abraam gasa ten (10) ikalki wingirind yipa tab Melkisedekim yokawonj, si Lebi gu rigap to-daka kea Melkisedekim ten (10) ikalki wingirind yipa tab yokawo Abraam kima yipand. ¹⁰ Mop nokip re Melkisedek Abraamim pilke itemb yipa tab yokatonj, Lebi gu riga re maka pita aukito aji omanda Abraamimna komind wekenonj.

Melkisedek pila Yina Mopyam Si Riga Yesu

¹¹ I God yina si riga aramkinonj si mile iyenam re Lebi gu ke riga na. I ingkenaemb ket Ju rigap gog yit akatto. Si rako onggit yina si rigaina si milep Godimna ril ririrkipjog amnito, si nangga pena kwa God singi awonj yipa b'enga yina si riga Yesund onyitam yet ra yina si riga tainy odede nya ke it re Melkisedek re dide aji ma odede nya kae it re Aron re dide. ¹² I rada God kea yipa b'enga yina si riga yoramitonj, si gog yit daka b'ogla kwa b'enga wip wa tengendanj. ¹³ Si onggityam yit re ija emb ji onggityam b'enga yina si riga gatab yindenya da ton re b'enga gu ke riga e rina re onggit gu ke maka yipa rigat si yomnikonj yina si omnikapu kapind. ¹⁴ Mop nokip men pitakipind wumir im da Yonggyam Yesu re Yuda gu ke b'usmureni b'iga na, i dide Mose maka yipa riga yingawonj yina si riga wiko iyenam onggit gu ke. ¹⁵ Si ingkaimemb men ket pitakipjogind wumir aukindam da God kea b'enga yipa yina si riga yoramitonj odede nya ke it re Melkisedek re dide, si onggit penaemb Ton gog yit daka kea b'enga wip wa engenjinonj. ¹⁶ Si itemb b'enga yina si riga pita awonj re ma

gog yit kena rina re Mose Lebi gu riga engainonj yimta undokam aji yirkokar okawayam Godimna dandam pilkena rinte ra makwa ita negir tainy.

¹⁷ Si yina pebat Ti gatab ija emb ji yindenya da,
“Man re dadal ngirpu kesa yina si riga et
odede nya ke it re Melkisedek re dide.”

¹⁸ Si God naska ingaeni Mosemna b'ingawa yit kea awir amnikinonj, nokip opimemb b'ingawa yit re ma danda na dide ma ririr na ingaenam.

¹⁹ Mop nokip gog yitit maka nangga na ririrkip yomnonj. Aji onggit b'enga yina mopyam si riga Yesum pilke re kea yipa b'ogiljog warim b'ogil isma pita awonj, i men ket intemb warim b'ogil isma yir yungaenenyu. Si ingkaimemb men Godim wus wa aukenenindam.

²⁰ I kwa daka re God Yesund yina si rigam yomnonj, Ton kea Tina nyi kima yopulitonj Tin obagendam. Aji Ton maka Tina nyi kima yopulitonj ninda yina si riga obagikam. ²¹ Aji re God Yesund yina si rigam yomnonj, Ton kea odede Tina nyi kima Tin danda kima yomnonj da,
“Yonggyam God danda kima Tina nyi kima yindenonj,

i Ton makwa ita ket nonykok b'etngenj.
Si Man re dadal ngirpu kesa yina si riga et.”

²² Si odede opurena kenaemb God Yesum gatab yimjatonj meranim, si Yesu kea b'ogiljog outinti tirir omnijog mal riga awonj God dide riga ganggand. ²³ I kwa ra yipa yina si riga uj tainy, si si omnika mile kemb ipenj. Si onggit penaemb jogjog yina si riga wekenenonj kesam peba winind, nokim da idenat kwa yipat daka tina pipmetind b'atiikinjis. ²⁴ Aji Yesu re dadal ngirpu kesa yina si

riga e yibneneny, si onggit paemb makwa ita yete Tina yina si riga pipmetind b'atikinjis dem. ²⁵ Si onggit paemb yepiya ra Yesund gar ke utkunda ke okasi Godim pilwa menonim, si Yesu ririr e towa kupkakupka ririrkipjog yirkokar takainy. Mop nokip Ton ita winind b'angonjeni e yibneneny towanim yirkokar okawam, i ket Godim pilwa yitnono aukeneny towa gatabim.

²⁶ Si odede yina mopyam si riga re ririrkipjog e meranim. Si Ton re yina omni e, i negir mile kesa e, i dide kilkip kesa e yibim. I Ton re odede Riga e yibim yena re God yewaikitonj negir mile riga wa pilke, i ket yurowatonj pumb teretere wa dea de komkesa wub gou wa amninonj dide ket danda pipmetind yoramitonj Tina yimjog yim tab ke. ²⁷ I naska kesam peba winind yina mopyam si rigap bibir weanjweanj Godim pilwa si b'angga eyenento, naska towainajog negir mile awir omnam i ingkaemb ket rigaina negir mile awir omnikam. Aji Yesu ma ita singi aeny odede ita bibir si b'angga iyenam, mop nokip re Ton Tina ji ke si yomnikonj wul b'agbagind, Ton kea yipapyam komkesa riga wa si mile undwatawonj. ²⁸ I gog yitit yina mopyam si rigam abagikinonj re odede riga na yepiya re rigaina danda ririrind wimena wuwenonj. I onggit gog yit kak ke God Tina nyi kima yopulitonj Tina B'iga obagendam yina mopyam si rigam yena re God dadal ngirpu kesa ririrkipjog yomnikeneny.

8

Yina Mopyam Si Riga Yesu dide Sisil Outinti Tirir

Omnijog Yit

¹ I onggityam meraina opurena wingirind intemb ji ukoi jog yitkak tainy da mera ita onggityam yina mopyam si riga yibim yete re juwai kima pipmetind omiti yibim ukoi jog Godimna wip omnenapu kasa yimjog yim tab ke de pumb tungg wa. ² Si onggit meraina yina mopyam si rigate wiko omnika yiyeny Godimna si omnikapu yina plaimetind, it re iminjog Godind ewangayam yinayinajog pipmetind. I itemb plaimet re Yonggyam Godimna orange e aji ma rigaina yim ke orange e. ³ I God komkesa yina mopyam si riga abagikinonj re singi si gasa dide si b'angga Godim pilwa iyena mana. Si itemb meraina yina mopyam si riga Yesu Todaka b'ogla si gasa oramis Godim pilwa. ⁴ Si onggit paemb rako Ton onggit gowukoyind wimena yikenonj, Ton ma rako yina si rigamna wikond yibnonj. Mop nokip yina si rigap kea gog yit ririrind Godim pilwa singi si gasa eyenento. Aji Ton re kea pumb tungg wa yikonj. ⁵ Si ton onggityam towaina yina si mile omnika eyenento onggit gowukoi yinametind re mal dide wingata mile e rinte re iminjog yibim pumb tunggind. I onggit mop penaemb re Mose si omnikapu yina plaimet orangam yomnonj, God tin danda kima nonony yomnonj da, "B'obogil yir kima oranget. Si man b'ogla komkesa onggit met wip ririrkipjogind oranget rina re Kon men mouyawond de onggit Sinai dor kumbind." ⁶ Aji it re ket Yesu Tina yina si riga wiko yokatonj re ukoi jog na towaina wikom pilke rina re ton gog yit ririrind amnikenento. Mop nokip Ton b'ogiljog inyinyind yir iyena riga na awonj God

dide mera ganggand, i ket Ton kea sisil outinti tirir omnijog yit yoramitonj God dide mera ganggand. I onggityam sisil outinti tirir omnijog yit re b'ogiljog e, nokip onggityam yitkak pita awonj re Godimna b'ogiljog tirir omni yit kima na.

⁷ Mop nokip rada naskanyam outinti tirir omnijog yit maka b'injawa kima yibnonj, si God ma rako singi awonj onggit nimogim sisil outinti tirir omnijog yit naskanyam yitimna pipmet okatam.

⁸ Si God kea ninda b'injawa odarka teyinonj Ju riga wa wingirind yepiya re naskanyam outinti tirir omnijog yit wirand wekenonj. Si onggit paemb Ton odede yinden yina peband da,

“Yonggyam yinden y da, ‘Ra win ik dem,
Kon ita sisil outinti tirir omnijog yit oramis
Israel riga wa pilwa dide Yuda Riga wa pilwa.’

⁹ I kwa Yonggyam yinden y da,

‘Si onggityam sisil outinti tirir omnijog yit re ma odede e it re naskanyam re dide rina re Kon yomnikond Israel rigaina b'uar kima onggit winind re Kon ten Koina yim ke emorki apenjinonj Ejipt gou ke.

Mop nokip ton maka onggityam Koina outinti tirir omnijog yit ririrind wimena wuwenonj,
si Koda ket ten kak eaeninond.’

¹⁰ I kwa Yonggyam yinden y da,

‘Intemb ji Kon onggityam outinti tirir omnijog yit omniken Israel riga kima,
ra onggit obagendi win ik dem.

Si Kon opima Koina gog yit taramkinyin towaina nonykokind,

- i kwa Kon onggityam Koina gog yit opima
 terikinyin towaina garind towanim ong-
 watam.
 I Kon ita towanim God taen dem
 dide ton opima Koina riga taukanj dem.
 11 Si makwa yipa rigat ita tilenggyam ti rigand
 ouyaeny
 dide makwa tilenggyam ti nany o yingganind
 yit omnenny da, "Man wumir ae Yong-
 gyamim!"
 Mop nokip goujog riga ke de ukoijog riga,
 ton komkesa ra dem Kornim wumirjog im
 tekeny dem.
 12 I Kon opima towaina negir kaokao mile gatab
 kear tamneninyin dem awir omniam,
 i dide Kon makwa ita ket nonyind tawame-
 neninyin dem towaina negir mile.'"
 13 I God kea yogenayonj itemb yimtanyam outinti
 tirir omnijog yit da sisilyam e. Si onggit opurena
 ke God kea naskanyam outinti tirir omnijog yit
 kesamim yomnonj. Si nangga na ra kesam tainy,
 ton ket kep auka yik re b'eomnena ma.

9

Gowukoi Yinametind Si Omnika gatab Yit

- 1 I naskanyam outinti tirir omnijog yitim re
 kea yibnainonj Godind ewangayam b'ingawa yit
 dide onggit gowukoi yina pipmet. 2 I Godim si
 omnikapu yina plaimet nimog kok ikalki yibnonj
 re ukoi gutomgutom kobirgim kena Godind ewan-
 gayam. Si naskanyam kokind re kea wekenonj
 ngaya oramkapu oror, i yipa kasa i dide yina sana
 onggit kasa kumbind. Si itemb kok yogenaeneno

da yina pipmet. ³ I nimogim kok rina re ukoi gutomgutom kobirgim kak ke yibnenenonj re ija na yogenaeneno da yinayina pipmet. ⁴ I inaemb ji gasa onggit kokind ebnonda, osi re gold ke omniki ngirangngirang si gasa imbrikapu kap, i gold ke ousiki boks ogenaya da Godimna outinti tirir omnijog yina boks. I onggit boks borand inaemb ji gasa wekenonj, opi re gold ke omniki sospen rikind re mana onggit borand wekenenonj, i Aronimna kutip rina re wil ikkonj, i dide nimog gimopagpag rikind re Godimna outinti tirir omnijog yitkak iriki wekenenonj. ⁵ I onggit gog boks kumbind kea dikind gold ke omniki aneru ebnonda ogenaya da kerubim. I onggit boks tumind negir mile irabikam kear pipmet re onggit aneru waina tamakak pip nat yibnenenonj. Si otade onggityam gasa yipayipa b'obogil isipkenam re ma ririr e tau.

⁶ I re ket onggityam komkesa gasa b'obogil ongonjeni wekenonj, yina si rigap kea onggit naskanyam kok wa b'igaremento ita winind, i ket Godind ewangaya mile amnikenento. ⁷ Aji nimogim kok gatab re ija emb ji da yina mopyam si riga nenate ita kemagind yipapyam nena b'itgarik, i kwa ton ma ita b'itgarik kus kesa rinte ra ton Godim pilwa oramis tinajog negir mile dide kwa rigaina nony kesa omniki negir mile eommenam. ⁸ Si Yinayina Wingawingate pita wa omnika yiyeny onggit gatab da ra naskanyam outinti tirir omnijog yit ririrind onggit gowukoyind yinametind si omnika teyenanj, toda yinayina pipmet wa b'igaram nya re ija e ipangendi kesa ibim Godim wip wa menonim. ⁹ Si onggit naskanyam outinti

tirir omnijog yit ririrind omnika mile re wingata mile e yunim rinte re sisil outinti tirir omnijog yit danda wirand yibim. Si nangga ma ji rada yipa rigat onggit naskanyam mile ririrind singi si gasa dide si b'angga teyeniny Godim pilwa, onggit millet makwa ririr e onggityam ewangaya rigamna kukip ke nonykok kupkakupka kilkesa ominy. ¹⁰ Si onggit naskanyam yitit ingaena yiyeny re odede gim ke b'ingawa mile nena im, opi re owou gatab i onaya gatab i dide b'engabenga iseka mile gatab. Aji ra onggityam win ik dem ridenat ra sisil outinti tirir omnijog yit pita tainy, si onggityam naskanyam mile opima seg taukanj dem.

Kerisomna Kus ke Si Omnika gatab Yit

¹¹ Si Keriso re kea yina mopyam si riga na awonj b'ogil gasam rinsim re yu pita auka wuweny. I Ton kea ket b'igarkonj ukoijog dide ririrkipjog si omnikapu yina plaimet wa rinte re ma rigaina yim ke orangi e yibim. Si itemb yina plaimet re ma onggit otobarki gowukoi kae, aji pumb tungg nate yibim. ¹² I Ton onggit yina plaimet wa b'igaronj, dide ket Ton yipapyam dadal ngirpu kesa meraina negir mile erabinonj re ma goutimna kus kena o kau b'igamna kus kena aji Tinajog kus kena. I ingkenaemb Ton ket meranim iminjogim yomnonj yirkokar okatam. ¹³ I naskanyam God ma outinti tirir omnijog yit wirand yina si rigap odede gasa kenaemb kil kima auki riga isanka eyenento yina omnikam, opi re goutimna kus o rigayam kaumna kus o konggayam kau b'igamna imbriki bila. I onggit millet kea riga wa pilke kil awir amnikeneninonj. ¹⁴ Si Yinayina Wingawinga

yete re dadal ngirpu kesa yibim, Tonit Kerisond wip yiyonj, i onggit Tina wip iyena kena Keriso Tilenggyam Tina ji kus kima b'akawonj b'injawa kesa yina si gasam Godim pilwa. Si onggit Tina kusit iminjog danda kima ririr e meraina kukip ke nonykok kilkip kesa tamnikiny ujimna negir omnika mile ke. Nokim da idenat men yilo Godind b'obogil ewangaya yiyu.

¹⁵ Si onggit penaemb Ton sisil outinti tirir omnijog yit wirand inyinyind yir iyena riga awonj God dide riga ganggand. I Ton ket uj awonj onggit negir mile irabam rina re rigap omnika eyenento naskanyam outinti tirir omnijog yit wirand. Nokim da idenat riga yena re God ara emokinonj, ton b'ogla owabinsi dadal ngirpu kesa b'ogil rina re God tirir amninonj okawam. ¹⁶ Mop nokip ra yipa rigat ti rigawar wa tirir yit terarau, onggityam tina yit ita iminjogim tainy dem ra ton uj okas. ¹⁷ Si itemb tirir omni yit idenat ririrkip tainy ra onggit rigat uj okas. Mop nokip onggit tirir omni yitim re ma ita danda tainy b'ingawam ra itemb riga yilo ibim yet re tirir yit yoramitonj. ¹⁸ Si onggit mop penaemb naskanyam outinti tirir omnijog yit toda makwa ke wiko omniam b'atomonj kus kesa. ¹⁹ Mop nokip Mose naska komkesa b'ingawa yit komkesa riga wa usekainonj re gog yit ririr nat. Seg ket ton kau b'iga waina kus [i gout waina kus] yipand nyi kima akasinonj, i ket kuskus mamoi ngii ke dide yisop wul petam ke gog peba dide komkesa riga isanka eyeninonj. ²⁰ I ket Mose yindonj da, "Itemb kus re onggit outinti tirir omnijog yit iminjog omnam mal e rina re God wen engainonj yimta undokam." ²¹ I odede yipa wip

nya kena ton kus ke isanka eyeninonj si omnikapu yina plaimet dide kwa komkesa yina gasa rina re engaenento onggit yina plaimetind si omnikam. ²² Si momta komkesa gasa re kus kena kilkip kesa aukenento gog yit ririrind. Si kus igmarki kesand makwa opima negir mile awir taukanj.

Kerisomna Uj kae Negir Mile Awir Omnikam

²³ Si onggit paemb yinamet dide komkesa yina gasa rinsim re onggit metind wekeny b'ogla kilkip kesa taukanj odede b'angga kus ke. Aji onggit gowukoyimna komkesa yinamet dide yina gasa re iminjog yina gasa waina wingata im rinsim re wekeny de pumb tungg wa. Si onggityam iminjog pumb tunggimna yina gasa b'ogla kilkip kesa raukine b'ogiljog si kus ke aji ma odede e it re si b'angga kus ke re dide. ²⁴ I gowukoi yinayina pipmet re onggitim jaba wingata e yibim rinte re iminjog yinayina pipmet yibim de pumb tunggind. Si Keriso maka b'igaronj onggit rigaina yim ke omniki yinayina pipmet wa. Aji Ton ade b'igaronj yinayina pipmet wa pumb tunggind, i ket yu meranim onyiti yibim Godim wipind. ²⁵ I gowukoi yina mopyam si rigap kemag weanjweanj yinayina pipmet wa b'igarenento b'angga kus kima na, aji ma towaina kus kima na. Aji Keriso pumb tungg yinayina pipmet wa b'igarkonj re ma jogjogpyam Tilenggyam si gasam b'akaena mana Godim pilwa. ²⁶ Si rada Ton b'ogil e jogjogpyam Tilenggyam b'atkaeny yina mopyam si riga pila, Ton keako jogjogpyam na uj ma b'idgotnena yokatenonj gowukoi otomapu ke ngirpu yu. Aji Ton gowukoi undwatapu winind pita awonj re

nok mana da idenat Ton yipapyam ngirpu kesa si gasam Tilenggyam b'atkau Godim pilwa rigaina negir mile awir omnikam. ²⁷ Si itemb re get ke oramiti yit e da riga b'ogla yipapyam uj okas, i onggit kak ke ket ton b'ogla b'isagika daka kwa okas Godim wipind. ²⁸ Si Keriso todaka odede yipa wip nya kena yipapyam uj awonj, i ingkenaemb ket Godim pilwa si gasam b'akawonj jogjog rigaina negir mile urowatam. I kwa Ton nimogim pita tainy dem ra ma negir mile urowata ma. Aji Ton yirkokar okawa mim riga tatupiny dem yepim re Tin gar singi kima yir yungaenenyi.

10

Keriso Yipapyam Si Mile Yundwatoni

¹ I gog yit re b'ogil gasa wa wingata nena e rinsim ra wari tui. I itemb gog yit re ma iminjog kip kima omnikam gasa e. Si onggit paemb nangga ma ji rigap kemag weanjweanj usausapyam si b'angga teyenenanj Godim pilwa gog yit ririrind, aji onggit millet makwa ririr im riga ririrkipjog kilkip kesa tamnikiny yepim re wuweny Godim ewangayam. ² I rada kea gog yit millet riga ririrkipjog kilkip kesa amnikinonj, ton kakoa seg aukito Godim pilwa si gasa iyenam. Mop nokip Godind ewangaya rigap makwa opima towaina negir mile gatab negir ke epindenanj towaina kukip ke nonykokind, nokip re ton yipapyam si mile yomniko, si ingkaimemb ton kilkip kesajog auki wekeny. ³ Aji re ton kemag weanjweanj si gasa eyenento Godim pilwa, si ton kea kemag weanjweanj

nonyik amdenento towaina negir mile. ⁴ Mop nokip rigayam kaumna kus o goutimna kus ke re makwa ririr e negir mile eommenam.

⁵ Si onggit paemb re Keriso ikonj onggit gowukoi wa, Ton yindonj Godim pilwa da,

“Man maka singi aenot si b'angga dide owou si gasa rina re rigap eyenento Mor pilwa.

Aji Man ita ongonjenyit Koina ji Kornim si omniam.

⁶ I kwa Man maka sam aenot kupkakupka b'angga imbrika si mile dide ninda negir mile eommenam si mile.

⁷ I Kon ket nindond da, ‘O God! Yir de, Kon kea netkond dikind Moina singi omniam, odede ringmim re yina peband iriki wekeny Kor gatab.’ ”

⁸ Si nangga ma ji da rigap kea si gasa eyenento Godim pilwa gog yit ririrind, Keriso onggit peband pumb ke odede yindenonj da, “Man maka singi aenot si b'angga dide owou si gasa rina re rigap eyenento Mor pilwa. I kwa Man maka sam aenot kupkakupka b'angga imbrika si mile dide ninda negir mile eommenam si mile.” ⁹ I kwa onggit kak ke Ton yindonj da, “Yir de, Kon netkond Moina singi omniam.” Si Ton onggit yit ke naskanyam outinti tirir omnijog yit awir yomnonj, nokim da idenat Ton itlis nimogim outinti tirir omnijog yit.

¹⁰ Si onggit Godimna singi kenaemb Yesu Keriso yipapyam Tinajog ji meranim si omniam yorami-tonj Godim pilwa, i ingkenaemb ket Ton men yinam nomninonj.

¹¹ I naskanyam outinti tirir omnijog yit ririrind komkesa yina si rigap bibir weanjweanj ony-iti Godind ewangaya yiyeneno, dide kwa usausapyam yipa ririrkip si gasa eyenento Godim pilwa. Aji onggit si gasap re makwa ririr na negir mile awir omnikam. ¹² Aji meraina si riga Yesu Keriso yipapyam dadal ngirpu kesa si gasa yiyonj Godim pilwa rigaina negir mile eommenam. I Ton ket juwai kima pipmetind omitonj Godimna yimjog yim tab ke. ¹³ I amaemb de Ton Keriso win yir ungawa yiyeny, ngirpu ra God onggit Kerisomna komkesa geja riga gou wa tamniny dem dide taramisiny dem Tina pis wirand Tina danda ondratenam towa kumbind. ¹⁴ Mop nokip Ton yipaina si mile kena dadal ngirpu kesa ten ririrkipjog amninonj yena re Ton yinam amninonj.

¹⁵ Si Yinayina Wingawinga Toda kwa ita onggit gatab yir ungata yit yopureny mera pilwa. Si Ton ket naska ija emb ji yindeny da,

¹⁶ “I Yonggyam God yindeny da, ‘Intemb ji Kon onggityam outinti tirir omnijog yit omniken, Ju riga, ton kima ra itemb obagendi win ik dem.

Si Kon opima Koina gog yit taramkinyin towaina garind,

i Kon kwa onggityam Koina gog yit opima terikinyin towaina nonykokind towanim ongwatenam.’

¹⁷ I Kon makwa opima ket nonyind tawameninyin towaina negir mile dide towaina gog kesa kaokao mile.”

¹⁸ Si rada Keriso kea onggityam negir mile awir amninonj, si Toda makwa ita ket b'usaya si mile omnik negir mile eommenam.

Ara B'emoka Ririrind Mimkam Wimenin

¹⁹ Gar ke utkunda nany dide yingganwar! Si onggit paemb men ririr im ket moga kesa b'igarkam Godimna yinayina pipmet wa de pumb tungg wa, nokip Yesu kea meraina negir mile erabinonj Tina kus ke. ²⁰ Si Yesu ket sisil yirkokarim nya yipangendonj meranim yinametind ewirinti ukoi gutomgutom kobirgim kena b'igarkam onggit yinayina pipmet wa. I itemb ukoi gutomgutom kobirgim re Tina ji e rina re uj awonj wul b'agbagind. ²¹ I mera ita ket ukoi jog yina si riga yibim komkesa Godimna riga yir ipkam. ²² Si Yesu kea meraina garind Tina kus ke isanka niyeninonj, i ingkenaemb ket meraina komkesa negir jog mile esekinonj rina re kukip ke nonykokind wekenonj. I Ton kwa meraina ji daka kilkip kesa nyi ke eaukinonj. Si onggit paemb men b'ogla iminjog gar singi kima dide kupka gar ke utkunda imjatena kima wowenin Godim wip wa. ²³ I kwa men b'ogla b'obogil danda kima imninena kesa emorka yeyenenu warim b'ogil isma rinte re men gar ke utkunda ke pitapita omnena yiyenyu. Mop nokip men ririr im Tin nony i jawam yet re tirir yit yopulitonj meranim okatam. ²⁴ I dide kwa men b'ogla meralenggyam meralenggyam nony kubir raininum, nokim da idenat men b'ugowa tuwenyin singi b'iyena mile dide b'ogil mile omnikam. ²⁵ I kwa men goro yipand gilgil b'eoma

gatab bond b'epinum odede ringmim re ninda rigap siram b'irari kesa bondik yomnikenenyi. Aji men b'ogla usausapyam b'ugowa wowenin siram b'irari kesa b'eomapu wa menamenam, ra ket men yir ongong iyu da Kerisomna itenda bibir re wus wa e auka ik.

²⁶ I rada men kea iminjog yitkakim wumir okati im wekenyin, i onggit kak ke ra ket kwa men meraina singim pilke negir mile omnika teyenindam, si maemb ita ket yipa si gasa komb ibim si omnikam onggityam negir mile eomnenam. ²⁷ Si odede rigam awir e kwa nangga b'ogil e yibnau yir ungaukam, aji tinim yir ungaukam ra moga kima God ma b'isagika mile e dide b'irmatena kima wul dimil e rinte re ongonjeni yibim eomnenam yepim re Godind kak yiaenenyi. ²⁸ I kesam peba winind, yet ra Mosemna gog yit erbek, i kwa ra nimog o nowa riga yir ungata yit tapurenanj, si onggityam towaina yir ungati yit ke ton b'ogla kear kesa uj okas. ²⁹ Si kesam peba winind gog yit erbeka rigap odede naemb ji ukoi bebig okatena teito. Si win b'obogil onggityam mile gatab nonyik b'amdeninam. Ra yipa rigat Godimna B'iga Kerisond isnawa kesa gou wa omnenny, i ra Tina outinti tirir omnijog mal kus yina kesa omnenny ringgit kusit re tin yina yomnonj, i dide ra wurar ogonayam Yinayina Wingawingand negir yit ke omnenny, si ridede ukoi jog bebig im ton takasiny dem? ³⁰ Mop nokip men wumir im God ma onggityam yitkak. Si God yindenya da,

“Kor maemb ten mira omnenam yepim re gejam nomnennyi. Si Kon opima towa mira takainyin.”

I Ton b'usaya yindeny da,
“Yonggyam opima Tina riga isagika teyeniny dem.”

³¹ Si itemb re moga kima e yilo Godimna yim kumb wa awowim Ti pilke b'isagika okatam.

³² Si win nonyik amjina onggityam naska win gatab ridenat re God wen ngaya enyowainonj i win ket Yesund gar ke utkunda ke yokatonda. I dide onggit kak ke re win jogjog b'idgotnena kima b'ajobrena wuwenot, aji win kea gar ke utkundand mimkam ke wimena wuwenot. ³³ Si ninda winind rigap wen riga bajbajind ingar kima eyenento ji malik omniam dide bebig kima b'idgotnena oramitenam. Aji kwa ninda winind win kea yingg akatentondam ton kima yepiya re odede yipa wip bebig akatenento. ³⁴ I win yipand b'idgotnena akatenentondam sibibmet riga kima. I kwa re Yesund gar ke utkunda map rigap wainajog gasa isanikesa isambura eyenento, aji win kea sam kima odede negir mile wip awarkentondam. Mop nokip wa pilind kea odede wumir yibnonj da wanim re b'ogiljog gasa im wekeny rinsim ra dadal ngirpu kesa tekeny wanim ingaenam. ³⁵ Si onggit paemb win goro b'itiskokindam onggityam waina moga kesa gar ke utkunda mile. Nokip onggit milet opima ukoi jog b'ogil mira wa tetiyainy dem. ³⁶ Si win b'ogla mimkam wimena tuwenyit, nokim da idenat win Godimna singi mile omnika teyenindam, i ingkek ket win takatenindam nangga na re God tirir yit yoramitonj wanim ogonam. ³⁷ Mop nokip yina pebat ija emb ji yindeny da,

“Sobijogjog win kak ke,

yete re ik, Ton ita ik. I Ton ma ita win ip-longkis.

³⁸ Aji Koina negir kesa dimdimjog riga re gar ke utkunda nena kae wimena okateny dem.

I ra ton mogamoga kaknyakaknya itendena yik, Kon ma ita tinim gar sam taenyin.”

³⁹ Aji men re ma odede riga im yepim re mogamoga kaknyakaknya itendena wuweny ngirpu negir okasi. Aji men re iminjog gar ke utkunda riga im, si men ita kupkakupka yirkokar okasu.

11

Gar ke Utkunda Mile

¹ I gar ke utkunda mile re iminjog omnena mile e nangga e re warim b'ogil isma yibim, dide kwa gasa nony ke iminjogim imjata mile e rinsim re maka yir ongong eyenanj yirjog ke. ² Si God onggit gar ke utkunda mile kena yir ungata mile riga wa akaeneninonj yepiya re kesam peba winind wekenonj.

³ I men gar ke utkunda kae wumir yokatenyu da God kupka wub ake gowukoi Tina yit kena atobarkonj. Si onggit paemb nangga im re yu men yir ongong eyenindam re ingkenaemb aukito nangga im re men ma ririr im yir ongongim.

⁴ I Abel gar ke utkunda kena b'ogiljog si gasa yoramitonj Godim pilwa, aji Kain re ma b'ogiljog si gasa na yoramitonj nokip ton gar ke utkunda kesa na. Si God Abelim gatab yir ungata yit yindonj da ton re negir kesa dimdimjog riga e, nokip God kea b'ogil yit kima emjasinonj tina si gasa. I nangga ma ji da ton kea b'ila uj awonj, aji ton ita onggit gar ke utkunda ke yitnono aena

yikeny men ouyaenam. ⁵ I re God Enokimna gar ke utkunda yimjatonj, si Ton ket Tin yurowatonj onggit gowukoi ke. Si Enok maka uj yir yongonj. Si yina peband ija emb ji yindenya da, “I makwa yipa rigat tin yodaronj, nokip Godit tin yurowatonj onggit gowukoi ke.” Mop nokip naskand re ton onggit gowukoyind yibnonj, yina pebat kea odede yir ungata yit kima tin yimjatonj da, “Ton Godind samim yomnikenenonj.” ⁶ I yet ra maka gar ke utkunda oramis, ton makwa ririr e Godim sam okaenam. Mop nokip yet ra Godim pilwa menon okas, ton b'ogla gar ke utkunda ke yem-jat da God re ita yibim i dide Ton opima mira agoniny yepim re Tin iminjog oraka yiyenyi. ⁷ I Nowa gar ke utkunda kena Godim pilke ingawa yit akasinonj rina re ton makwa ke yir anginonj. I ton ket itemb Godimna ingawa yit gatab moga kima yisnaenenonj tina garind, si ton ket yipa ukoi giga yoranganj ti b'igawar kima ngiwirim pilke b'awaentam dide ket yirkokar okatam. I ton onggit gar ke utkunda mile kenaemb gowukoi riga wa negir ma b'isagika yoramitonj, dide ket onggit gar ke utkunda mile ke ton Godim pilke negir kesa dimdimjog riga nyi yowabintonj.

⁸ I re God Abraamind ara yemokonj menonim de onggit tungg wa rinte ra ton tinim owabinjis, ton kea gar ke utkunda ke itemb God ma ara emoka yundokonj. I re ton ti tungg ke yiwatonj, ton maka wumir awonj ritade re ton menon yokatonj. ⁹ I re ton onggit Godimna tirir omni tungg wa opendonj, ton gar ke utkunda ke ija na plaimetind wimena yikenonj odede ringma ra b'enga tungg ke riga plaimetind yiyoyoi wimena ikeny. I kwa

ton Isak ake Yakob kima yipand wimena yikenonj yepiya re yipaina Godimna tirir omni yit yoka- tonda yipand gilgil owabintam. ¹⁰ Mop nokip Abraam ina dadal ngirpu kesa imnineni kesa pipmetind orangi taun yir ungauka yiyenenonj rina re God yisamkonj i ket yorangonj. ¹¹ I nangga ma ji da Abraam ti kongga Sara kima re kea b'iga orakam win mogjog igoukena yiyonda, aji ton gar ke utkunda ke b'iga orakam danda yokatonj. Mop nokip ton kea Godind gar ke utkunda ke yimjatenonj yet re tirir omni yit ti yokawonj. ¹² Si onggit paemb onggit yipaina riga Abraam pilke yet re b'iga orakam danda kesa midjog na yibnonj, jogjog b'iga b'usmurento odede opi re wubind jogjog iki re dide, i kwa odede opi re sipa gatend ogenka kesa jogjog jimiya re dide.

¹³ I komkesa insimemb ji riga opi re gar ke utkundand wimena wuwenonj, ton maka onggityam gasa akatento rina re God towa tirir omni yit ogona eyeninonj. Aji ton onggityam gasa yir ongong nena eyenento i simesime amnenento pajapaja, i dide ton towalenggyam b'agenaenento da ton re onggit gowukoyind obayam im dide tungg tib kesa riga im. I ton ket kea komkesa uj aukito. ¹⁴ Si nangga pena ton b'agenaenento da obayam im dide tungg tib kesa riga im, nokip ton oraka yiyeneno re towainajog tungg na. ¹⁵ Si rako ton onggityam gowukoi towainajog tungg nonyik yiyeneno itendam rina re ton yiraro, towanim keako b'ogil gangga na awonj onggit towainajog tungg wa itendam. ¹⁶ Aji ton re otomantijog towainajog tungg na gar singi kima yir ungawa yiyeneno rinte re yibim pumb wa. Si onggit

penaemb God maka ten ingar ke akasinonj, re ton Tin yogenaeneno da “Sowa God”. Mop nokip Ton kea towanim yipa taun yongonjenonj towanim wimenam.

¹⁷ I re God Abraamind yotonkitonj tina gar ke utkunda gatab, ton kea gar ke utkunda ke Isakind si b'anggam yiyonj Godim pilwa. Si ton intemb ji riga yet re Godimna tirir omni yit akasinonj, i Godim pilwa si b'anggam yiyonj re tina lesmita b'iga na. ¹⁸ Si God Abraamind yomnonj da, “Kon Isakim pilke b'usmureni b'iga nena im moina b'igam tagenainyin.” ¹⁹ Si Abraam kea iminjog ke yimjatonj da God ririr e Isakind uj ke utnyis. Si onggit gatab wingata yit ija emb ji da Abraam b'usaya Isakind uj ke yokatonj. ²⁰ I Isak daka gar ke utkunda kena Yakob ake Esau b'ogil amnonj rinsim ra wari towanim pita taukanj. ²¹ I Yakob gar ke utkunda ke Yosepimna b'iga nimog yipayipa b'ogil amnonj, re ton uj momtand yibnonj. I ton ket tina kutip kumbind b'irmekiti yir opmitonj. ²² I Yosep gar ke utkunda ke Ju riga waina Ejipt ke iwata gatab God ma yitkak nonyik yomdonj tina uj momtand, i ket Ju riga engainonj tina kak gatab da, “Ra win iwasya, win koina kak eyindam dem win kima.”

²³ I Mosemna b'u ake mog gar ke utkunda ke towa b'iga Mosend yegitonda nowa mobu kima, re ton ukendonj. Mop nokip ton yir yongonda re otomantijog b'iga na. I dede mile ke ton kingimna b'ingawa yit yerbekonda, aji ton maka tinim moga awonda. ²⁴ I re Mose rigajog awonj, ton gar ke utkunda ke b'isayonj tin ogenayam Ejipt kantri mopyam king Parao ma ngimngai b'igamna b'iga

ke. ²⁵ I ton b'abagendonj Godimna riga Ju riga kima yipand b'idgotnena yingg okatenam, aji ton ma singi na sobijog ganggand negir mile kima sam okatenam. ²⁶ I ton iminjog ke yimjatonj da Keriso map b'idgotnena okatena re ukoijog e, aji komkesa Ejipt kantri b'ogiljog gasa re ma ukoijog im. Mop nokip ton yir yikenonj re wari Godim pilke mira okata mana. ²⁷ I Mose gar ke utkunda ke Ejipt kantri yiraronj, aji ton maka Ejipt kantri mopyam king Paraomna soro moga yuwadonj. Mop nokip re ton Godind yir yongonj yena re rigap ma ririr e yirjog ke yir ongongim, ton kea danda yokatenonj bebig wingirind moga kesa Godimna yit yimta undokam. ²⁸ I kwa Mose gar ke utkunda ke Ju riga engainonj uj igwanta gatab mile omnikam dide met mora yiu pumb ke dide gou ke kus isnikam. Nokim da idenat uj ondrikayam anerut maka Ju riga waina naskajog ukki leo b'iga uj tandrikiny. ²⁹ I re Ju rigap Ejipt ke opekto, ton gar ke utkunda kena Kuskus Sipa ijendo odede ringmim re rigap gil nya wuweneny. Aji re Ejipt rigap b'atonkitto Ju riga pila menonim onggit sipand, i sipa nyiwit ten ekanginjnonj, ngirpu ton uj aukito. ³⁰ I Ju rigap gar ke utkunda kena Yeriko taun bau ke ugumarena yiyeno seben (7) bibir kima, si ket taun dir kea osmulitonj. ³¹ I re Yosuwu nimog riga etmikitonj Yeriko taun wa wigawiga taun undongam, i re taun rigap ten oraka eyeno yimind usunatam, yipa yiyagiyag iyenapu kongga Raab gar ke utkunda kena osiemb riga nimog gar ngimbla kima simesime amnonj, si re Israel rigap Yeriko riga uj andrikto, itomb kongga Raab maka negir yokatonj yipand ton

kima yepiya re maka Godind yimta yundokeneno.

³² Si ringma, kon b'ogil im b'usaya ninda yit tapureninyin? I ra kon komkesa odede riga gatab yit tapureninyin, opi re Gideonim gatab i Barakim gatab i Samsonim gatab i Yeptam gatab i Dawidim gatab i Samuwelim gatab i dide bageyam wa gatab, si win re kutjog e tainy yit undwatam. ³³ I opimemb riga gar ke utkunda kena ninda geja kantri gou wa amnenento, i ton gar ke utkunda kena negir kesa dimdimjog mile ke riga wip amnenento, i ton gar ke utkunda kena gasa imda eyenento rina re God tirir amnikainonj towanim okawam, i ton gar ke utkunda kena laiyon waina tugim epmindenento. ³⁴ I ton gar ke utkunda kena moga kima wul dimil asoukenento, i ton gar ke utkunda kena geja rigamna giri orkak ke ewaikenento, i ton gar ke utkunda kena danda akatenento, re ton danda kesand wekenenonj, i ton gar ke utkunda kena danda mop aukenento geja omnikand i ket b'enga kantri ke geja riga b'ikenam amnenento towaina kantri ke. ³⁵ I re ninda konggap gar ke utkunda yoramito Godim pilwa towaina uj riga gatab, si God kea ket towaina riga utnikeneninonj uj ke towanim okawam. I kwa ninda rigap gar ke utkunda kena bebig kima b'idgotnena akatenento, aji ton kea b'isaenento towanim itringendam onggit b'idgotnenam pilke, nokim da idenat ton tutnikanj dem b'ogiljog yirkokarind wimenam. ³⁶ I kwa ninda rigap gar ke utkunda kena odede b'idgotnena akatento, opi re ji malik omnika mile dide kus kima iraska mile. I kwa daka ninda re gar ke utkunda kena sein kai ke ijobiki dide sibibmetind oramki wekenonj. ³⁷ I

nindap gimokip ke idriki uj aukito, i nindap so ke tabtab okangki uj aukito, i nindap geja giri ke ipki uj aukito, i nindap mamoi gim o gout gim b'ikoki wuwenonj. I nindap gasa kesa owoupa wuwenonj i riga wa pilke b'engabenga b'idgotnena akatenento i nenegir nya ke otonkena akatenento.

³⁸ Si gowukoi riga re ma ririrkipjog na aukenento gar ke utkunda riga kima wimenam. Si opimemb gar ke utkunda riga bebig kima wimena wuwenonj re wul kesa tungg nata i riga kesa dor tungg nata i gong bora nata i dide kip bora nata.

³⁹ I opimemb komkesa riga gar ke utkunda kena wimena tuwonj, si ingkenaemb ket God ten yir ungata yit kima emjasinonj. Aji ton makwa ke yokato rina re God tirir amninonj okawam. ⁴⁰ Mop nokip God kea naska nata b'ogiljog yit yisamkonj meranim, nokim da idenat todaka b'ogla men kima yipand gilgil ririrkipjog taukanj.

12

Godimna Yimak Yit kima Bebig Oramka Mile

¹ Si onggit paemb meranim re odede wubind rim pila jogjog yir ungata riga im wekeny meraina gar ke utkunda b'ikok gatab yepim re men ewatinti nowamanj. Si men komkesa bebig gasa ratogikinum rinsim re il ongnena niyenanj meraina b'ikok wingirind. I dide negir mile b'eskokinum rinsim re danda kima patpat emorka niyenanj ena ognatenam. I men ket b'ogla mimkam ke b'ekinum Godimna oramiti b'ikokpu nya wa ngirpu de undwatapu mal wa.

² Si men adea de Yesum pilwa yir resokinum

yet re gar ke utkunda mile yotomonj dide ket ririrkipjog yomnonj meranim. I Ton mimkam ke wul b'agbagind b'idgotnena yokatonj, aji Ton maka ingar gatab ukoi ke yir yongonj. Mop nokip Ton samim aukenenonj re onggit gatab mana rina re God yoramitonj Ti wip ke. I Ton ket juwai kima pipmetind omi yibim Godimna wip omnenapu kasa yimjog yim tab ke. ³ Si win nony wuwene Yesum pilwa rija na re Ton mimkam ke odede b'idgotnena akasinonj, re negir mile rigap Ti pilind negirjog mile amnikento Tin ejgatenam. Nokim da idenat win maka danda kesa auka tuwenyit dide win ket maka waina gar ke utkunda b'ikok ena tagnasindam.

⁴ I win kea b'ajobrena tuwot negir mile gou wa omnenam, aji win makaima waina yirkokar b'akaindam kus igmarka kima onggit negir mile kima geja omnikam. ⁵ I win kea nony b'edattondam onggityam b'ugowa yit rina re God wen amneninonj Tina b'iga pila da,
 “Kor b'iga! Goro tawaineninim ra Yonggyam mor pilind yimak yit kima bebig taramiteniny dindim omnikam.

I goro gar bebig kima ena b'atignatim ra Yonggyam samany mitiyou dindim omnikam.

⁶ Mop nokip Yonggyam ten yimak yit kima im bebig oramka eyeniny dindim omnikam yena re Ton singi eyeniny.

I Ton opima ipowa eyeniny komkesa riga rina re Ton Tina b'igam emjinonj.”

⁷ Si win b'ogla mimkam ke bebig akateninam dindim awowim odede nony menamena kima da God odede mile ke nogenainy re Tinajog

b'iga mim. Mop nokip komkesa b'uarip opima towainajog b'iga wa pilind yimak yit kima bebig oramka eyenauranj dimdim omnikam. ⁸ I rada God maka wen bebigind taramiteniny dimdim omnikam, win ma Godimna owabinti b'iga im i win ma Tina iminjog b'iga im. Mop nokip komkesa b'iga opima towainajog b'u wa pilke bebig akatenanj dimdim awowim. ⁹ I kwa daka mera opima gowukoi merainajog b'uar yepiya re mera pilind yimak yit kima bebig aramkenento dimdim omnikam. Si nangga ma ji da ton kea mera pilind bebig aramkenento, men kea ten esnaenentondam. Si ringma, ridede ukoi kana im men b'obogil onggityam bebig gar singi kima takatenindam rinsim re meraina wingawinga ke B'uit mera pilind aramiteniny dimdim omnikam. Si ra men odede b'obogil takatenindam, men opima ngirpu kesa yirkokar wimena tuwenyin. ¹⁰ I meraina gowukoi b'uarip mera pilind yimak yit kima bebig aramkenento re sobijog gangga kima na dide odede nya kena it re b'ogiljog na towaina nony menamena ke. Aji God mera pilind bebig aramiteniny dimdim omnikam re ma odede im opi re meraina b'uar re dide aji b'ogiljog im meranim. Nokim da idenat Tina yinayina mile men yingg takatenindam. ¹¹ I yepiya ra yimak yit kima bebig takatanj dimdim awowim, onggit winind towanim makwa opima odede wip taukanj da b'ogil sam kima im aji kopa b'angnena kima im. Aji yepiya ra onggit bebig okatena ke b'atouyaenenanj, onggit b'auyaena kak ke ton opima negir kesa dimdimjog mile tamnikenenanj, i idenatemb ket ton b'ogil ngimbla kima milend

wimena tuweny.

¹² Si onggit paemb nangga ma ji da win kea ninda bebig ke gim yarim aukitondam waina gar ke utkunda b'ikok wingirind, win b'ogla b'usaya danda takasindam b'ikokim. ¹³ I win b'ikinam dimdim gar ke utkunda nyawind rina re Keriso yongonjenonj. Nokim da idenat pis kobkob pila wingawinga ke kopa kima riga maka gomgom riga taukanj, aji ton b'ogla onggit kopa ke b'itisakkanj dide ket danda kima gar ke utkunda ke b'itkenanj.

Nonony Yitkak dide B'ingawa Yitkak

¹⁴ I win b'ogla komkesa riga kima ngimbla omnikam dide yina yirkokarind wimenam nya oraka teyenindam. Si onggit yina yirkokarind wimena kesa makwa yipa rigat ririr e Yonggyamind yir ong dem. ¹⁵ I win yir kima wuwene rika ita yipa riga yibim wa wingirind yete re bebigjog yibim God ma wurar okatam. I kwa win yir kima wuwene rika ita yipa riga yibim wa wingirind yete re negir guda kima wul ap pila wigawiga ngornyangornya b'amka yikeny wa wingirind i ket bebig omnika eyeniny wa wingirind, ngirpu ingkaemb ket ton jogjog rigaina wingawinga yirkokar negir omnika teyeniny. ¹⁶ I win yir kima wuwene rika ita yipa riga yibim wa wingirind yete re yigyig b'iyena mile omnika eyeniny i Godind ewangaya kesa wimena yikeny odede Esau re dide. Si Esau tilenggyam tinajog nanyam b'iga nyi yosogonj yipaina pleto owou kena rinsim ra ton pop komkesa ti b'uimna gasa tawabinsiny. ¹⁷ Si win kesam peba ke wumir im da Esau kea yimta ke ti b'und yigekitonj onggit

nanyam b'igamna b'ogil owabintam, aji ti b'u yisayonj. Nokip onggit winind Esaum re makwa yipa gangga awonj onggit nanyam b'igamna b'ogil b'usaya itendam ti pilwa rina re ton yosogonj, nangga ma ji ton pop yirekip kima oraka yiyenonj.

¹⁸ I win tuwot re ma odede gowukoi pipmet wa na it re Sinai dor re dide rina re Ju rigap yesopayo i wul dimil b'irmatenonj i sibib dide si gipar yibnenonj i dide depu rib yikenonj. ¹⁹ I win kwa maka tuwot odede bibol ipaya ara dide yitpiam wa pilwa rina re Ju rigap Sinai dor paga ke utkundento. Si re ton onggityam ara utkundento, ton mogapip Godind yigekeno da, "Goro kwa b'usaya sowa pilwa yit b'itiskokim." ²⁰ Mop nokip ton makwa ririr na okatam odede b'ingawa yit da, "Yet ra onggityam dor tij, nangga ma ji da b'angga, tin daka ita gimokip ke uj ondrasya." ²¹ I onggit dor ke pita auki mile re ma sobijog moga kima na, si Mose daka yindonj da, "Kon ma sobijog moga kima e kaktiti aenyin." ²² Aji win tuwot re Siyon dor wa na, i yilo yirkokar Godimna taun wa na, i pumb tungg Yerusalem taun wa na, i dide ogenka kesa jogjog ten tausin (10,000) aneru waina diyamdiyam b'eomapu wa na. ²³ I win tuwot re naskajog ukki rigaina sosi wa na yaina nyi im re iriki wekeny de pumb tunggind, i komkesa riga wanim b'isagika riga Godim pilwa na, i dide negir kesa dimdimjog rigaina wingawinga wa pilwa na yepiya re kea ririrkipjog aukito. ²⁴ I kwa win tuwot re Yesum pilwa na yete re sisil outinti tirir omnijog yitimna inyinyam yir iyena riga yibim God dide riga ganggand, i onggit isanki b'ogiljog kus wa na ringgitit re rigaina negir mile

eomneninonj aji ma ija e it re Abelimna kus re dide ringgitit re mira omnenam yitnono aenonj.

²⁵ Si win yir kima tekenyit, nokim da idenat win maka Tin isaya yete re wen yitnono ameniny. Mop nokip rako Ju rigap maka ririr aukito b'ikenam Godimna negir ma b'isagikam pilke, re ton Mosend yisayo yet re onggit gowukoi wa Godimna b'ingawa yit akainonj. Si men ridede wip ukoijog bebig kima negir ma b'isagika im takasindam, ra men Tin isayu yete re men yitnono nomneniny pumb tungg ke? ²⁶ Si onggit winind re God yitnono aenonj Sinai dor ke, Ton kea gowukoi yuwongnenonj. Aji yu Ton ija emb ji tirir omni yit yinj da, “Kon kwa yipapyam uwongnenyın ra ma gowukoi nena e dem, aji kwa ita wub dem.” ²⁷ Si it re yitkak “kwa yipapyam” nok ma pitakipind yindenı da God ita komkesa Tina otobarki gasa tuwongneniny dem, i ingkaemb ket teomneniny dem. Nokim da idenat Ton uwongnena kesa gasa nena terarkiny dem. ²⁸ Si onggit paemb men Godind siteket yit yamnenu, nokip men kea itemb uwongnena kesa pumb tungg yokatonda Ti pilke. I dide men onggit siteket yit ke Tin gar sam kima yewangaenenyu isnawa kima dide moga kima. ²⁹ Mop nokip mera God re wul pila kupkakupka negir gasa eomnena riga e.

13

Kikitum B'ingawa Yit

¹ Si win gar ke utkunda nany dide yingganwar b'ogla walenggyam walenggyam iminjog nanyingganwar pila singi b'iyena milend wımena tuwenyit. ² I win goro nony b'etıdateninam tungg

tib kesa riga b'obogil sam kima obai omnenam. Mop nokip odede mile kenaemb ninda rigap kea nonony kesa aneru b'obogil obai amnenento. ³ I win b'ogla nonyik amdeninam sibibmet riga odede nony menamena kima da wida opima ton kima yipand sibibmetind bebig kima wimena wuwenyit. I kwa win b'ogla nonyik amdeninam riga yepim re riga wa pilke negirjog b'idgotnena akatenanj odede nony menamena kima da wida opima ton kima yipand waina jiwind b'idgotnena akatenindam. ⁴ I win komkesa riga b'ogla waina molkongga mile dide molkongga pil b'asopaya mile tesnaenenindam, aji goro onggityam mile kilkil tamnikinam. Mop nokip God opima tesagikiny dem yigyig b'iyena riga dide gigir dide yigyig b'iyena mile riga. ⁵ I win goro wulkip singind wimena tuwenim, aji win nony ririrkip na tekenyit nangga im re wa yimind wekeny. Mop nokip God yindeny da, "Kon makwa ita men nony metidatenenyin. I Kon ma ita men kak mitiaenyin." ⁶ Si onggit paemb men b'ogla iminjog danda kima odede yina peba yit kima nendeninum da,
"Yonggyam re kornim yim okawa riga e.

Si kon makwa ita moga taenyin
Si yete gim ke rigate nangga e omnik kor pilind?"

⁷ I win b'ogla nonyik amdeninam waina wip iyena riga yepiya re God ma yitkak wa use-nenauto. I win nony wuwene ridede na ton wimena tuwonj dide uj aukito, i ingkaimemb win towaina gar ke utkunda mile tataikenindam. ⁸ I Yesu Keriso re inta yipa ririrkip yibim sim ke, yu ke dide waritawarita ngirpu kesa.

⁹ I komkesa b'engabenga ouyaena dide sisil wip ouyaena milep wen goro nony kesa ramneninem dindim nya ke b'enga tab wa wip iyenam. Mop nokip God ma wurar ke garind danda okatam re b'ogiljog e, aji ma owou gatab gog yimta undoka kaim. Si onggityam owou gatab mile re kip kesa im. ¹⁰ I mera ita sisil yina si b'angga imbrikapu kap, aji yina si riga wa awir e danda onggit kap ke si b'angga ongongim yepiya re si omnikapu yina plaimetind wiko omnika eyenento gog yit ririrind. ¹¹ Mop nokip yina mopyam si rigap b'angga kus eyenento de yinayina pipmet wa re rigaina negir mile eomnena mana, i daka onggityam b'angga ji embrikenento re towaina wimenapu kemp tungg bau kena. ¹² Si onggit paemb Yesu daka kea Yerusalem taun mora bau ke b'idgotnena yokatonj wul b'agbagind uj awowim. Nokim da idenat Ton Tinajog kus ke Tina riga yina tamniny. ¹³ Si medaka ket b'ogla Yesumna ingar kima wul b'agbag yurowatenu dide ket meraina wimenapu kemp tungg ke ropekinum de bau wa Ti pilwa. ¹⁴ Mop nokip mera awir e yibim dadal ngirpu kesa wimenapu tungg dikind gowukoyind, aji men inte yir ungauka yiyenyu onggityam dadal ngirpu kesa tungg wimenam rinte ra ik. ¹⁵ I Yesu re kea wul b'agbagind si yomnikonj. Si onggityam Tina si omniki kenaemb men b'ogla ipendi kesa esourena si gasa reyeninum Godim pilwa. I onggityam meraina esourena si gasa re meraina gar ke utkunda gatab riga wa danda kima pitapita omnena mile e da, "Kon Yesumna riga en." ¹⁶ I kwa win goro nony b'etidateninam riga wa pilwa b'ogil wiko omnikam dide yingg iyenam nanggamog im

re wa pilind wekeny. Mop nokip odede mile re Godim b'ogil si gasa im ringkae re God nony sam aukeneny.

¹⁷ I waina wingawinga ke wip omnena riga re towaina yirkokar isingkandena kima im wen wingawinga ke yir ipka eyenanj odede nony menamena kima da ton b'ogla towalenggyam waina wingawinga gatab yit turowatenanj Godim pilwa. Si onggit paemb win b'ogla utkundeninam opimemb waina wip omnena riga i dide towaina yit ririrind b'akaena tuwenyit. Nokim da idenat ton b'ogil gar sam kima wiko omnika teyenanj aji goro gar bebig kima. Mop nokip ra ton gar bebig kima wiko omnika teyenanj, win makwa opima b'ogil isma yir tangindam onggit mile ke.

Undwatapu Yitkak

¹⁸ I win b'ogla yir opmiteninam sowa gatab. Mop nokip sin iminjogim yimjatenyu da sowa ita b'ogil kukip ke nonykok, nokip ita winind sin b'akawa wuwenyın re b'ogil dimdim wiko omnika mim. ¹⁹ I kon wen komkesa etenainyın onggit gatab yir opmitenam da God ken wanakana nentend wa pilwa.

²⁰ I mera Yonggyam Yesu, it re ukoi mamoi yir ipka mopyam riga, kea kus yigmarkonj ngirpu kesa Godimna outinti tirir omnijog yit ririrkip omniam, si ingkenaemb ket ngimbla God Tin yutnyitonj uj ke. ²¹ I onggit Godit wen ririrkip ramnikin komkesa b'ogil gasa omniam Tina singi ririrind. I Ton kwa Yesu Kerisomna oramiti danda ke mera pilind wiko ramnikin ringkae ra ton sam okateny.

Si itemb Yesu Keriso, Ti pilwa b'ogil inyomarena dadal ngirpu kesa ngirpu kesa, iminjog.

²² Kor nany dide yingganwar! Kon wen etenainyin b'obogil emorkam koina onggityam b'ugowa yit, nokip kon itemb leta yiriken re ma pinjog e. ²³ I kon wen wumir tamninyin da mera gar ke utkunda riga Timote ke sibibmet ke openjim. Si ra ton wanakana ik kor pilwa, kon ita ton kima wen tadarinyin.

²⁴ I win koina widaemb yit tamnenindam komkesa waina wip omnena riga wa pilwa dide komkesa yina riga wa pilwa. I Italiya ke gar ke utkunda rigap wen widaemb yit amnenanj.

²⁵ Godimna wurar komkesa win kima.

Wipi Yit God ma Yina Sisil Yina Peba
The New Testament in the Wipi Language of Papua
New Guinea

Nupela Testamen long tokples Wipi long Niugini

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 11 Nov 2022 from source files dated 9 Oct 2020

a5a5213a-fb12-52b5-9c99-efb8044c6646